

Transkription von Urkunde ZET 1377a

Ort, Datierung: Zerbst, 1377-12-13

Signatur: Stadtarchiv Zerbst, IA, 41

Inhalt: Rat der Stadt Zerbst:

Wý Ratmanne der stad Tzerwist . allen kristen lǝden dý disse ghegenwerdighe schrift sehen . horen
adir lesen . Vnse mǝghelicke dinst . vnd plichtiger / trúwe stedicheit . Wen gheschichte vnd ding mit
vortgange der tyt von gedechtnisse der menscheit vorswindet vnd vorgheten wert . it en si denne dat /
dý vorsichticheit der wisen dý gheschichte vnd ding mit tǝghen vnd mit schriften in ghedechtnisse
beholden . beuesten vnd ewich maken . Hirvmme wý Rat/manne tv Tzerwist willen opembar sýn vnd
bekennen vor allir menscheit dý nv is . vnd hir na tv komende wert . Dat wý nicht alleýne mit eighener
/ vulbort vnser willen . sunder mit witschaft vnd mit eýndrechtigem rade der vorsichtighen wisen lǝde
Der schepen und ynningen meýste(re) . vnd bǝrghe(re) / ghemeýne der ghenanten stad Tzerwist . Vnd
ouk mit rade vnd vulbort der vorstender der elenden in der parkerken sente Nýcolaus hebben ge
gheuen / vnd gheuen in dissem brýue lǝtterlicken tv erwerdicheit des almechtighen goddes vnd der
allir hilghesten ivnkvrowen Marien sýner muder vnd ouk / tv troste salicheit vnd ewighe ghedechtnisse
der elenden Twene wischepel kornes gewonlicker markt mate Eýnen wischepel roggen vnd eýnen
wische/pel ghersten von eýner breide hvuen tv der andern missen der elenden altar . ghebuwet vnd
ghestichtet in der par kerken sente Nýcolaus . Jn der hilghen mer/terer ere Lýuini . Valentini . Barbare
und Dorothee . Disse twene wischepel kornes scal Andreas Jǝterchowe bǝrgher tv Tzerwist . dý nv
disse beschreue=/ne breide hvue drift vnd winnet . adir sýne nakomelinge . wen he von disser werlde
scheidet . gheuen vnd bringen alle iar deme altaristen . deme dý / ghenante altar tv der anderen missen
geleghen is . vp sente Mertens dach ane vortoch . Vnd dý twene wischepel kornes scoln ewighe tyt tv
der and(er)en mis/sen des siluen altares bliuen . tv des nvt vnd vrome dý dar med begnedighet is . vnd
scal dat also bestellen und vǝghen . dat he siluen tv homisse týden . / adir eýn ander prýster von sýner
weghen ouer dem dicke ghenanten altar misse halde . Vort mer wý Ratmanne tv Tzerwist mit vulbort
der er ghe/schreue lǝde leggen vnd gheuen tv ewigher tyt . tv der siluen anderen missen der elenden
altar . Eýne mark b(ra)ndenborghes silueres ierlickes tinses an deme / huse ieghen sente Nýcolaus kor .
Dý mark scal Hans hesse . dý nv in dat hus wonhaftich is . adir wý dat vp ierlickem tinse nýmt . deme
pryste(re) der anderen missen / des ghenanten altaris gheuen alle iar tv twen týden . eýne halue mark
vp Passchen . vnd eýn halue mark in der meýnde weke . Vnd ouk hebbe wý er benǝm/de lǝde gegheuen
vnd gheuen ewichliken driddehaluen výrding brandenborghes siluers . vp výf schvhallen an deme vor
gheschreuen huse . Dissen drid/dehaluen výrding scoln gheuen Herman belitz . Klaus mǝlner . Hans
von wýden . Arnt dunker . Lǝtke peter . alle iar io welk eýnen haluen výrding . adir / wy nach orer tyt
tv tinse nýmmet dý vor gheschreuenen hallen vppe sodanghe tyt alse sý vor mýdet werden . Dar nach
hebbe wý Ratmanne tv Tzerwist / mit vulbort der erghenanten lǝde gegheuen vnd gheuen tv der dicke
ghenanten misse des beschreuenen altaris eýn hus mit eýme garden vp dý mǝlen/brúkke . dat hans
sassen wente her tv von den elenden tv eruen tinse ghe hat het vnd dý ghenante Hans scal nv mer alle
iar deme pristere dý tv / der ande(re)n missen der elenden altar belenet is gheuen eýne brandebursche
mark in twen týden . eýne halue mark vp passchen . vnd eýne halue / mark in der meýnde weke von
deme seluen huse vnd garden . adir dý sýne neisten erfnamen sint nach sýme dode . Denne vort mer
gheue / wý ouk tv der ghenanten misse tweý bvden mit sodanghen garden alse dar tv wente noch

ghehort hebben . vnd heyne bernstorpes kindere wen/te her tv erflik beseten hebben . Disse bvden vnd garden gheuen vnd ghelden ierlickes tinses eyne mark . dy men dem priste(re) der anderen missen / der elenden altar gheuen scal alle iar vp sodanghe tyt . als dy bvden mit den garden vormydet werden . Vnd ouk scal man von dissen erueken vnd / garden schoten . waken und borgher recht dvn . als disser stad wonheit is . Dar nach alle disser vor ghenanten gvlde vnd tinses hebbe wy Ratmanne / tv Tzerwist . Vnd wy vorstender der elenden afticht ghedan vnd vortigen allent des . des vns Ratmannen von der stad weggen Tzerwist . vnd vns vorsten/deren der elenden . adir vnsen nakomelingen von der elenden weggen an der vorschreuen gvlden behoren mvchte . Disser rede vnd gaue sint tvghe / Klaus hoghensteyn . Hans rvlfs . Hans ghise . Wilken wils . Hynrik daghevyr . Hans predemitz . Heyne bulendorp . vnd Laurentz kopstorp des iares / Ratmanne . Klaus brizke vnd Hans gretz tv disser tyt vorstender der elenden . vnd vele ander guder lvdde . Tv orkvnde vnd ewighe dechnisse / dat disse vorschreue stücke gantz . ewich vnd unvorruket bliuen . tv der anderen missen des elenden altares von vns adir vnsen nakomelingen . / So hebbe wy Ratmanne tv Tzerwist vnse grote ingheseghil mit witschaft hengen laten an dissen brif . Dy gheschreuen is na goddis ghebort dret/teyn hvndirt iar. Jn deme seuen und seuentichsten iare . Jn sente Lucien daghe der hilghen ivnkvrouwen .